

**Sicher isch sicherer...**

**verDUMMY nomo!!**

**JOKER  
WAGGIS  
1997**



**Fasnacht**

**2016**

**[www.joker-waggis.ch](http://www.joker-waggis.ch)**

Ver  
DUMMY  
nomol

doo bisch erschlaage,  
wottsich an Cortège mit  
em Waggiswaage. Doch d  
Stääge linggs und rächts sinn  
z brait, das gfeerdet nadyyrlig d  
Sicherheit.

«VerDUMMY nomol...» muess aine hyyle,  
syy Finger duet sich daub aafyyle. Er het sich  
gschnitte – Gopfriidstutz – an däm Zeedel ooni  
Kanteschutz.

«VerDUMMY nomol...» der Bappe stampft, gseet sy Binggis,  
wo Ráppli mampft. Drum wird vom Comité beschlosse, statt  
Ráppli wirft me Sojasprosse.

«VerDUMMY nomol...» dumm isch s gloffe, er ka nit fange und wird voll  
droffe. E Leesig wäär – miir dien nit liege, Orangsche ney mit Droone z fliege.

«VerDUMMY nomol...» s isch scho bitter, der Cortège fiert entlang vo Gitter! Bim  
Intrigiere wird das zer Gwaal, de muesch vom Waage – hesch halt kai Waal.

«VerDUMMY nomol...» ob dinn oder duss, vom Pfyffe bikunnsch e Tinitus. Dää Vorschlaag  
wurd wool sicher gryffe, numme no halbi Deenli z pfyffe.

«VerDUMMY nomol...» und leer schlugge, duet e Bleeser von ere Gugge. Die Laarve bietet z wenig  
Sicht, notiert e Schugger in sim Bricht.

«VerDUMMY nomol...» gheersch aine flueche, wo no schnäll het welle Fasnacht bueche. Soone Saich er het  
vergässe, d Besspannig vo der Drummle z mässe.

«VerDUMMY nomol...» deert am Egge, duet der Staab vom Major stegge. Verbiete sett me all die Waffe, de griegsch  
scho Albdraim nur vom Gaffe.

«VerDUMMY nomol...» jetz macht mer dicht, bald isch d Fasnacht doo z Basel Gschicht. Vor luuter Angscht und Hyschtery,  
sinn ainzig d Schugger no derbyy!

Will Sicherheit uns wichtig isch, mache miir jetz raine Disch. Zem an der Fasnacht kenne feschte, wänn miir doo der Ärschtfall teschte.  
Uns Waggis gseet me frieh bim Raase, dangg «DUMMY» Straiffe uf dr Naase. Und s Glagge vo de Zoggeli, gheert vo wytem jeede Joggeli.  
Der Waage schwaarz und gää skaliert, daas alles, dermit nit Schlimms bassiert. Rund umme warne groossi Schilder – in rooter Farb mit glaare  
Bilder. Und was fir Gfoore uf Dii luure – verstoosch no besser dangg Figure. Im Voorfald d Brämse kontrolliert, au neyi Liechter installiert. Hän d  
BeSiBe eneyere loo, der Fasnacht nit im Wääg duet stoo... E Fyrlischer s isch nit verkeert, uff em Waage, won er aane gheert. Uf d Route navigiert  
der Faarer, mit null Promille im Bluet au glaarer. Das alles hän miir unternoo, das wiirggig nit me schief sott goo. «Sicher isch sicherer» kennt me maine,  
doch sicherer isch derwääge kaine. Risike kasch zwoor minimiere, doch ebbs muess me gliich riskiere. So drängle d Lyt zem Waggiswaage – riskiere derby  
Kopf und Kraage. Fasnacht isch – wie s ganze Lääbe – mängmol gfeerlig und dernäabe. Si lauft nit stuur noch Brotokoll, so sell s syy – «verDUMMY nomol!»